

敕修陝西通志

第九
函
十冊

陝西通志第九十卷

藝文六

頌 贊 箴 銘

甘泉宮頌

漢王褒

甘泉山天下顯敞之名處也前接大荆後臨北極左撫仁鄉右望素域其宮室也仍截辟而爲觀攘抗岸以爲階壅波瀾而鱗砥馳道列以逶迤覽餘閣之靡麗覺堂殿之巍巍徑落莫以差錯編玳瑁之文櫨鏤螭龍以造牖采雲氣以爲楣神星羅於題鄂虹蜺往往而繞懷縵倏忽其無垠意能了之者誰竊想聖主之優游時娛神而款縱坐鳳皇之堂聽和鸞之弄臨麒麟之域驗符瑞之貢詠中和之歌讀太平之頌

司隸校尉犍爲楊世頌

王升

惟川靈定位川澤攸同澤有所注川有所通斜谷之川其澤南隆八

域所達益域爲充高祖受命興於漢中道由子午由散入秦建定帝
位以漢抵焉後以子午塗路澁難更隨圍谷復通當先凡此四道垓
鬲屯艱至於永平其有四年詔書開塗鑿通石門中遭元并西裔崖
殘橋梁斷絕子谷復循上則懸峻窟曲深巔下則入窅碩寫輪開平
阿源泥常蔭鮮晏永石相距利磨确曙臨危搶礪屨尾心寒空興輕
騎遮礙弗前惡蟲葬狩蛇蛭毒蟬未秋截霜稼苗春殘終年不登置
餒之患卑者楚惡尊者弗安愁苦之難焉可具言於是明知故司隸
校尉犍爲武陽楊君厥字孟文深執忠伉數上奏請有司議駁君遂
執爭百僚咸從帝用是聽廢子由斯得其度經功飭爾要敞而晏平
清涼調和烝民乂寧至建和二年仲冬上旬漢中太守犍爲武陽王
升字稚紀涉歷山道推序本原嘉君明智美其仁賢勒石頌德以明
厥勲其辭曰君德明明炳煥彌光刻過拾遺厲清八荒奉魁承杓

億衛疆春宣靈雪秋敗苦霜無偏蕩蕩貞雅以方寧靜丞庶政與乾
道輔主匡君修禮有常咸曉地理知世紀綱言必忠義匪石厥章恢
弘大節讜而益明探往卓令謀合朝情醴艱自安有勲有榮禹鑿龍
門君其繼蹤上順升極下達川皇自南自北四海攸通君子安樂士
庶悅雍商人咸熙農夫永同春秋記異余亦紀功垂深億載世世歎
誦又曰明哉仁知豫識難易原度天道安危所繫勤勤竭誠榮名休
麗

京兆樊惠渠頌

并序

蔡邕

洪範八政一曰食周禮九職一曰農有生之本於是乎出貨殖財
用於是乎在九土上沃爲大田多稔然而地有塉墉川有墊下漑
灌之便行超不至明哲君子創業農事因高卑之宜驅自行之勢
以盡水利而富國饒人自古有焉若夫西門起鄴鄭國行秦李冰

在蜀信臣治穰皆此道也陽陵縣東其地衍隩土氣辛螯嘉穀不
植草萊焦枯而涇水長流旣灌維首編戶齊氓庸力不供牧人之
吏謀不假給蓋常興役猶不克成光和五年京兆尹樊君諱陵字
德雲勤恤人隱悉心政事苟有可以惠斯人者無聞而不行焉遂
諮之都吏申於政府僉以爲因其所利之事者不可已者也乃命
方畧大吏麴遂令伍瓊揣度計慮揆程經用以事上聞付在三府
司農遂取財於豪富借力於黎元樹柱累石委薪積土基跂工堅
體勢強壯折湍流欵曠陂會之於新渠疏水門通窬瀆灑之於畝
畝清流浸潤泥潦浮游昔日鹵田化爲甘壤稔黍稼穡之所入不
可勝筭農民熙怡悅豫相與謳談疆畔裴然成章謂之樊惠渠云
其歌曰

我有長流莫或遏之我有溝澮莫或達之田疇斥鹵莫修莫釐饑饉

困悴莫恤莫思乃有樊君作人父母立我猷猷黃潦膏凝多稼茂止
惠乃無疆如何勿喜我壤旣營我疆斯成泯泯我人旣富且盈爲酒
爲釀蒸彼祖靈貽福惠君壽考且寧

溫泉頌

北魏
元萇

夫駕輕烟勒麟鳳馳及奔星走攀流月蟬變羽化之民食霞吸露之
士斯蓋有道存焉自非人世之所覩縷至若泥行水驟血食之夫興
沒自天去來非已寸陰危於朝露百齡迅於滅電一物不諧則朏贅
以生庶事不康則風火以敗故聖人 百姓之多疾撰藥石以濟之
造化愍蒼生之鳩毒設甘餌以救之蓋溫泉者乃自然之經方天地
之元醫出於渭河之南泄於驪山之下淵華玉徹 清 靈感超
異峻 不測無樵薪之費而揚湯沸於楚鑊無 之 而寒暑調
於夏鼎高唐之雲朝發於水湄巫山之雨夕收於淵際青林碧草含

露而匝岸香風蕙

列錦而環渚於是左湯谷右蒙汜南九江北

海千城萬國之民懷疾枕疴之客莫不宿張而來賓療苦於水但

上無尺棟下無環墻悠悠君子我將安泊孤忝發軔咸池分條紫漢

道屬昇平弱年數仕旣歷通顯朝望已隆爰自常伯出居分陝地居

陸海之饒祿享封君之至而報天之效無聞恤民之譽安在每思傾

獨深以爲斯泉天實置之而人畧未備廼剪草開因林構

宇邃館來風清簷駐月望想烟露遲羽衣之或碩願言因茲

以蕩穢廼作頌曰皇皇山靈愍我蒼生浴彼溫泉於此麗川其水尅

神尅神尅聖濟世之醫救民之命其聖伊何排霜吐旭其神伊何吞

肱去毒無藉烟炭誰假樵木湛若虞淵沸如湯谷東枕華山西拒咸

陽連疇接畛墟落相望彩林爭翠棗樹成行香風旦起文靈夕張陂

彼麗山望想千里廼作高堂鴻飛鳳起三輔之英五都之士慕我芳

塵爰居爰止其聲既遠金華屑柱春山九轉目送羣羊手白犬控

鵠來思俟我於堂而

篇內原缺二十字

賜華原隱士孫思邈頌

唐太宗

鑿開徑路名冠太醫羽翼三聖調和四時降龍伏虎拯衰救危巍巍堂堂百代之師

乾元殿頌

王勃

臣聞鵬霄上廓瓊都開紫帝之庭鼇紀下清珍林闢黃靈之館兼山配極照鸞闕於霞標薦水涵元湛驪宮於霧壑斯則神徵語怪功潛鳥跡之初理涉非經道昧鶉居之始授鳳書而稽碧落仙構罕存按龜籙而質黃圖金模間起粵若風移處閭增巢灰火運之機業拒嚮明上棟括河圖之奧三堦布政詠匪日於靈臺百堵陳詩頌斯千於考室亦有黃軒瞰月樵門頽九洛之功璿闥排烟牧

野構三河之酷御燕臺而臨北極缺王度於祈招列雲閣而拒南
山隕黃謨於軹道然則卑宮喪禮采椽輕四海之尊豐屋延災柏
梁非萬乘之有雖因時立事奢儉殊流而弘道在人興亡迭運靈
光未造不窺九室之榮景福宏規猶擁三方之豐聞風舊史逮曹
馬而無譏觀跡故墟歷周隋而未得自我唐太陵遷構均五方於
鶴几之前中埜凝圖調六氣於虬牀之下坐圭臺而清俯仰晷緯
齊明臨鼎邑而重威靈風雷合響得元功於大壯其至在茲乎我
大唐鷄渾製極樹神宰而制山河鶴識裁儀闢太虛而有天地黃
精吐瑞潛龍苞象帝之基紫氣徵祥鳴鳳呈真王之表高祖太武
皇帝虹星湛色開寶胄於金壺蛟電凝陰發皇明於石紐白蛇宵
斷行移海岳之符蒼兕晨驅坐遘雲雷之業屬東隣委馭扇虐政
於叢祠北拱隳尊素皇圖於寶極蜚鴻集野瞻烏鮮投足之因膏

犢嘯風羣鹿無擇音之所天街五裂截鯨浦而飛芒地紐三分觸
鰲山而按節元虬在御埽圻甸而廓星都黃鳥分麾動扶搖而駭
雲陣鑣宮杖鉞跨高陌而登元轡野韜戈陟圯壇而擁號皇圖不
恃聖人追卷領之風神器無私才子奉褰裳之運太宗皇帝雲房
揖契壓麟璽於庭軒雷渚翔英擾龍鈴於周鑄入龍亨運抗鴛邸
而杖朱髦十亂恢基臨鶴州而擁黃鉞唐雲秘族潛開白水之徵
代景迴輪光踐丹邱之運權輿象緯削茅社而建瓊桃草昧風雲
席羅圖而創璿曆紫庭合粹括宇宙於宸襟丹宸凝尊運陶鈞於
寶思摘碧霄而鍊石上清耀魄之宮詔寰海而捐珠俯睇陽侯之
室功驅偃伯頓鶚視於華封道被來王靜龍吟於武庫元樞上運
卜年開累聖之符丹竈昇遐遺範敞謀孫之畫皇帝陛下椒庭襲
慶曜璿萼於霞庄蘭殿分休湛珠衡於月館道凝瓊鎮下蒼掖而

照重熙業峻銅樓憑紫軒而揖羣后環四瀛於舜抱漏蟻覃津栖
十景於堯衿巢螟荷照上元開錄寶龜定皇邑之模下武崇基飛
龍錫帝臺之構貞明啟運齊玉鏡於鸞門易簡成功偃銅符於鶴
仗懷降尊於襄野太階忘七起之勞念負重於焦原巾席托三危
之險臨翠嫵而則道天孕時成坐元扈而披圖神超物妙星潏縱
淑曳珠紱於銅臯雲野疏祥抗瓊枝於桂浦素蟾登慶六虛充牝
馬之貞丹雀御林二雅合關雎之好璿宮夜靜居龍幃而調元金
房晨開御駕階而緝化芝庭揖訓遠清和鳳之儀蘭珮承風競峻
當熊之節皇太子承雲紫座翌八柱於乾維湛粹青衢揖三樞於
地戶黃離踵曜太陽分銑樹之輝蒼震薦音少海控銀河之色鶴
笙飛奏想丹駕於瓊山鮑俎捐芳齒元冠於寶序彤闈問豎禮崇
監撫之威黼席興賢義極君親之愛若乃東門卹引疊仙構於熊

山西苑承家導靈波於鴈沼桐珪作瑞鳳毛曜丹穴之英茅壤分
維麟距冠元邱之俊吳宮延粹開朱柱於娥臺允野流芬疏芝蘭
於別館頻隈毓範雲扃分戚里之驩覃嶼凝規星閣絕郎官之請
雕龍命職縱跳澤而驤鱗翠鷁調司順義颺而撫翼月軒宵佇虞
谿降璿緯之精震帳晨披姜水洞金韜之蹟飛鶴書而抽海狀桂
壑於是投綸轉麟旆而揖山容松澗由其削衽軒圖瑞喬泛花綬
於鷄林農紀祥炎濯蘭纓於鳳水仙臺俶務三珪銓棘序之風天
秩調邦六府燮槐衢之典金門獻納縱麟筆於苔牋石館論思覈
龜章於竹槧淹中訪禮蹲龍揚壁水之波稷下談經飛兔躍環林
之秀詞庭吐鳳翫鳥跡於春蠶書帳翻螢閱蟲文於夏閣杏花千
畝紺轅照磨蜃之功桑柘三宮元紱降親蠶之禮園丘上闕奉蒼
壁於靈壇方澤下凝列黃琮於寶墀朱絃翠璫履霜懷四饗之尊

複雷重檐消日正三綱之首五靈奔慶冠虵澤於黃樞六祀銜欣
颺麟烟於紺席遺弓積慕虔深太廟之儀執豆推恩道振明堂之
禮瑤山廣樂備逸調於宮懸洞庭仙奏納遺歌於帝府九韶分唱
后夔清桂序之音六變同和飛鳳掌梧軒之律樽俎折旋之數苞
舉陰陽堂庭節奏之規彌綸宇宙靈襟索隱控風伯於詞林睿想
鈞深詔天吳於筆海神窮獨照傍探赤水之珍思洽幾深迴寫丹
谿之韻金壇紫露映銀籀而翻華白雪瑤林藻瓊章而吐絢蟬機
撮化銅渾將九聖齊懸虬箭司更銀漏與三辰合運爽鳩分職素
雲顏鳥喙之祥神獬鬣司元水照龍顏之則黃沙鞠草剗叢棘而
遷訛丹石滋苔仰甘棠而息訟融臯再稔方聞外戶之謠昧谷千
箱坐溢康衢之奏百城烟峙望秋露而乘風千室雲開合霄霆而
組化彤幃獨選熊羆下蘆雁之祥墨綬分賢犀檢降槐鸞之祉筠

驟佇信髦士一割寸刃目尋葦杖霑仁鮑叟攀輪而不暇龍蛇可踐
野人豐荷杖正大相聞城尉輟鳴桴之響五雲抽潤湛芳氣
於璿臺六府咸殷唱豐歌於銅闕不戒而昇東戶恩周動植之津
博施而舉南風化偃胎萌之寓神謀備豫儼七萃於丹樞邃畧防
微肅千廬於紫衛元戎握節黃公授犀闕之圖帝座聞輦元女薦
龍庭之策蘋柯婢刃中權決勝於兩階白羽俄麾善陣推亡於四
表朱匡反景之域削虵弭於文槐黑山明月之鄉委龍琛於武帳
錦軒星鶩控乾絡而觀風繡服霞驚浹神絃而問俗川浮沒羽鯨
谿靜丹浦之虞陸薦飛毛熊羆動青雲之偵銀關驟雨望紫陌而
趨恩鐵恍馳風計彤闌而瀝思赤馬文猿之實叢積乎郊虞紈牛
露犬之貢滿盈乎儲邸青邱晝野不踰征賦之鄉蒼水奉圖未盡
提封之貫且夫緯武經文宏業也含幽育明至誠也混齊六合大

功也規模百代昌數也故能襲九空而寧庶物劃千里而統諸侯
休徵象德而動嘉符觸類而至風揚晷洽藻乾慶於芳年水節河
謙藹坤正於明渚瑶枝結慶泉埃蕩玉蓋之文瓊液浮甘天酒綴
金莖之色黃蕤紫脫奏仙頴於中畿翠蕙丹萸疊靈株於上序駢
眸候日漾影蒙池比翰翻風栖光理木祥飛并絡震鱗題瑞朔之
元祉絢新郊枵獸紀和年之叙具靈篇之絕貺究先謀之殊休天
人之際交矣皇帝之道備矣由是三靈物覩扣蘭禁而棲誠九服
子來詠蒿宮而騁力去奢去甚不矜黃屋之隆匪樸匪雕方順丹
墀之請宸規相宅考周舊於靈都睿覽思和獲秦餘於正殿羣臣
列陛奏蕭相之遺模天子臨軒採荀卿之故事炎洲八桂遜仙拱
於林衡岱畎五松委靈材於梓匠衢宮記範萬機抗九戶之尊海
孽移琛千樂省十家之費飛廉卷藹徹煙極而浮薨屏翳敗津劃

星墟而置絜瑤階百雉光懸寶露之壇瓊壁萬尋影綵崇霞之閣
拖虹梁而四注星漢虧於上榮疊雲棟而三休寒暑隔於中雷雕
楣鶴企沓勢分規繡桷虬奔殊形別起圓璫布藻璽羽璧於狼泉
方鏡披蓮孕化璣於蜃浦芝樓對幄重傳五日之風芸閣列錢彩
鍛三旬之霧文疏罩迴陰兔息肩於綺寮翠幌籠霄陽烏鍛翼於
珠網豐隆按節下複櫺而司階列缺施鞭低叢楹而假道溫房佇
幸煦芳景於佳辰涼室乘閑凜徂飈於火序金鋪夕照若帝圃之
輝瓊英寶綴晨懸類阿房之聚銀燭烟邱碧桂翊珉陛而披香雨
岫頽筠夾璿流而颺影九衢翻翠雜仙卉於中逵四照非紅間靈
葩於右城神禽率舞光浮肆夏之軒瑞鳥相鳴響叶鈞天之樂鈞
陳宿列儼雙碣於丹霄綺微霞周闕千門於紫露爾其左扃嵩鎮
申侯降太室之正前枕莘郊伊尹發空桑之秀揭熊山而北眺貝

闕猶存覩龜溜而西分瓊臺易接總交中宇廓川陸而疏畿竟想
善隣揆風霜而建野然則因秦構極祖宗耀金策之符作洛恢基
我后創璿居之始援天引聖隔代重暉橫紫都而可襲配元宮而
非遠故能使神光夜燭鏡麟趾於文除仙渰晨華委鸞章於繡礎
靈爻密發八方昭大有之和寶篆潛開六合啟同人之會兩儀交
慶虛碧墀而翹旌萬寓披歡指蒼車而候蹕雖青蒲頌德東朝獻
龍鳳之圖而丹極鳴謙南面動貂羊之詔百神推策望瑯徑而虔
誠三讓奉符顧瑤壇而肅事龜書吐瑞按五校而分營鳳策揚輝
翔八鸞而節步帷宮霧轉列芝蓋於中天帳殿星離輒蒲輪於大
野紫鱗充饋若大帝之共臨素鶴翻華類羣仙之廣晏花開瑞雪
委瓊饌而調芳綵絢祥雲夾珠旗而曳影功推三祖銀繩勒東岱
之威業峻一人金筴奉南山之壽道既成矣元符集矣代既貞矣